

丹陽縣續志卷之十六

方技

鄭銘中字鐵崖工山水尤善傳真凡殉咸豐庚申難者
銘中儻夙與識面俱補繪如生光緒初普甯寺塑羅
漢銘中爲之意匠及成神采奕奕遠近傳以爲神
眭石亭善繪事傳真入妙間作大幅山水生動有致
汪毓慈字懷辰有膂力拳術得異人授隻身遇髮匪數
十與鬪悉辟易客居太平洲見洲人欺宜興周家楣
約不與水因舉水濱巨石上擲輕如弄丸洲人驚伏
謝過家楣因與定交後家楣貴毓慈乞代白大吏濬
九曲河平時以鐵桿吸淡巴菰長四尺重三十餘斤
郭念劬字心莪草書神似孫過庭兼作篆隸善畫山水
蘭竹竹刻亦精

韓善徵字止軒廩貢生宣統初舉孝廉方正耿介博學
孜孜撰著江督張人駿聘修省志勘訂多出其手中
年致力醫學著瘧疾論痢疾論陽痿論時病撮要醒
世瑣言金匱雜病辨持論高古不媚俗爲人處方極
精邑中著醫書者自善徵始

束士奇字雲峰邑庠生善奕每構思至忘寢食弱國手
周小松僅一子嘗入鄉闈與人奕連日不閱題紙而

出遊京師有日人造厲請奕負焉士奇名益著

丹陽縣續志

卷之十六

方技

一一

方外

印林號月樵持律嚴恪光緒中主普甯寺日手楞嚴不釋寺舊有唐鐘樓銳欲規復因費絀不果去之普陀山蘇常各寺重其名爭往延請返主蘇州承天寺其後普甯僧密泉圓寂強之歸見寺宇日蹙鬱鬱還承天旋化去

密機邑韋氏子中歲投延陵昌國寺爲僧受佛戒歷游五臺峩眉至金山江天寺謁大定言下開悟歸主金臺禪寺即仙臺觀掩關禁足者三年至老復歸昌國集僧眾講般若募建殿宇年七十餘無疾端坐而逝

丹陽縣續志

卷之十六

方外

三

亮燈卓錫麒麟寺戒行高卓晨興讀中庸畢始誦經典散誕不修飾以佯狂終

丹陽縣續志卷之十六終